

---

**Ordinaziun davart la finanziaziun extraordinaria da la tgira d'uffants complementara a la famiglia en il chantun Grischun pervia dal coronavirus (Ordinaziun chantunala davart COVID-19 tgira d'uffants)**

Dals 07-04-2020

---

Relaschs tangads da questa fatschenta (numers dal DG)

Nov: –

Midà: –

Aboli: –

---

Sa basond sin l'art. 48 da la Constituziun chantunala

relaschada da la Regenza ils 7 d'avrigl 2020

## **I.**

### **Art. 1** Intent ed object

<sup>1</sup> Questa ordinaziun ha la finamira da reducir las consequenzas economicas negativas ch'èn resultadas en il sector da la tgira d'uffants complementara a la famiglia tras il cumbat cunter il coronavirus (COVID-19), d'impedir che las purschidas d'assistenza vegnian donnegiadas duraivlamain ed uschia da gidar a mantegnair questas purschidas.

<sup>2</sup> Sco mesiras da sustegn prevesa questa ordinaziun agids finanziaus extraordinaris per purschidas da la tgira d'uffants complementara a la famiglia che garanteschan la purschida d'assistenza necessaria per uffants sin fundament da l'artitgel 5 alinea 3 ed alinea 4 da l'Ordinaziun 2 davart las mesiras per cumbatter il coronavirus (COVID-19)<sup>1)</sup>.

---

<sup>1)</sup> CS [818.101.24](#)

---

## **Art. 2** Premissas

<sup>1</sup> Agids finanziaus extraordinaris vegnan concedids per purschidas da la tgira d'uffants complementara a la famiglia che disponan d'ina permissiun per la tgira en chasas da dimora tenor l'artitgel 2 alinea 1 litera a da la Lescha davart ils uffants confidads<sup>1)</sup> e d'ina renconuschientscha da la contribuziun tenor l'artitgel 8 da la Lescha davart la promoziun da la tgira d'uffants complementara a la famiglia en il chantun Grischun<sup>2)</sup>.

<sup>2</sup> Purschidas da la tgira d'uffants complementara a la famiglia che vegnan manadas dal maun public na survegnan nagins agids finanziaus extraordinaris.

<sup>3</sup> Agids finanziaus extraordinaris vegnan concedids mo, sche las purschidas da la tgira d'uffants complementara a la famiglia garanteschon la purschida da l'assistenza necessaria ed han instradà mesiras manaschialas pussaivlas per reducir il deficit.

## **Art. 3** Dimensiun dals agids finanziaus

<sup>1</sup> Agids finanziaus extraordinaris vegnan pajads maximalmain en la dimensiun da la perdita da las contribuziuns da las persunas responsablas per l'educaziun, che han organisà sin basa privata l'assistenza dals uffants durant il temp da las mesiras per cumbatter il coronavirus. Sco contribuziuns persas valan quellas tariffas che las persunas responsablas per l'educaziun debiteschan a las purschidas da la tgira d'uffants complementara a la famiglia.

<sup>2</sup> Las prestaziuns da cumpensaziun da las assicuranzas socialas sco er retgavs extraordinaris vegnan deducids dals agids finanziaus. In eventual gudogn pers na vengn betg indemnissà.

## **Art. 4** Finanziaziun

<sup>1</sup> Ils agids finanziaus extraordinaris per purschidas da la tgira d'uffants complementara a la famiglia vegnan finanziaus mintgamai per 50 pertschient tras il chantun sco er tras las vischnancas da domicil.

## **Art. 5** Inoltraziun da las dumondas

<sup>1</sup> Dumondas da survegnir agids finanziaus extraordinaris ston vegnir inoltradas a l'Uffizi dal servetsch social chantunal dal Grischun.

## **II.**

Naginas midadas en auters relaschs.

---

<sup>1)</sup> DG [219.050](#)

<sup>2)</sup> DG [548.300](#)

---

### **III.**

Naginas aboliziuns d'auters relaschs.

### **IV.**

Questa ordinaziun entra en vigur retroactivamain ils 17 da mars 2020 ed è valaivla per ina durada da 6 mais.